

續資治通鑑

冊
主

卷之三

三

續資治通鑑卷第七十五

賜進士及第兵部尚書兼都察院右都御史總督湖北湖南等處地方軍務兼理糧餉世襲二等輕車都尉畢沅編集

宋紀七十五

起上章浹灘正月
盡十二月凡一年

神宗體元顯道法古立憲帝德王功英文烈武

欽仁聖孝皇帝

元豐三年

遼太康六年

春正月乙丑朔以太皇太后在殯

不視朝

癸酉升許州爲潁昌府

〔攷異〕張舜民云神宗自潁川郡王卽位熙寧

初升潁州爲潁昌軍久之知其誤遂升潁州爲潁昌府李燾云升潁州爲潁昌軍乃元豐二年八月二十四日九月十八日德音非熙寧初也神宗初爲忠武節度淮陽郡王後封潁王忠武卽許州軍額郡王則封淮陽非潁川舜民誤也

遼主如駕

鵞鵲

癸未審官東院言大理寺丞申天規昨乞長

告訪求其父今已迎歸侍養乞許天規不候歲滿朝

見從之天規少失其父至是訪得之年百歲矣己

丑高麗國遣使來貢 白虹貫日 辛卯于闐來貢

遼耶律伊遜

舊作乙辛今改

以改封王爵赴闕入謝遼主

卽日遣還改知興中府事 二月丙午以翰林學士

章惇參知政事 丙辰始御崇政殿視朝 丁巳命

輔臣禱雨 三月乙丑工部侍郎平章事吳充罷爲

觀文殿大學士西太一宮使 癸酉葬慈聖光獻皇

后于永昭陵 甲戌命王珪提舉修兩朝國史 丙

子南丹州人入貢 庚辰復置晉州趙城縣

致異王存九域志

在元豐二年今從長編

初熙寧中廢入洪洞縣爲鎮至是知州王

說言百姓輸納詞訴回遠歲輸稅課不便兼攷趙城

乃是國家得姓始封之地不與它縣邑比故復之

乙酉祔慈聖光獻皇后神主于太廟 己丑以慈聖

光獻皇后弟昭德軍節度使曹份爲司徒兼中書侍

郎護國軍節度使餘親屬加恩有差 庚寅遼主出
皇姪淳於外立皇孫延禧爲梁王加守太尉兼中書
令時年六歲以忠順軍節度使耶律頗德爲南院大
王以廣德軍節度使耶律仲禧爲南院樞密使以戶
部使陳毅參知政事 夏四月乙未觀文殿大學士
吳充卒年六十贈司空兼侍中謚正憲充爲相務安
靜將終戒妻子勿以私事干朝廷世謂充心正而力
不足譏其弗能勇退云 丁酉封宗暉爲濮陽郡王
濮安懿王子孫皆進官一等 乙巳以瀘州夷乞弟
侵擾詔邊將討之戊申乞弟寇戎州兵官王宣等戰
歿 御史臺言奉詔復置六察察在京官司今請以
吏部及審官東西院三班院等隸吏察戶部三司及
司農寺等隸戶察刑部大理寺審刑院等隸刑察兵

部武學等隸兵察禮祠部太常寺等隸禮察少府將
作等隸工察從之 甲寅罷羣牧行司復置提舉買
馬監牧司 乙卯遼主獵於炭山 五月甲子翰林
學士兼詳定禮文張璪言伏見天地合祭議者不一
臣竊謂陽生于十一月陰生于五月先王順陰陽之
義以冬至日祀天于地上之圜丘夏至日祭地于澤
中之方丘以至牲幣器服詩歌樂舞形色度數莫不
倣其象類故天地神祇可得而禮由此觀之夏日至
祭地于方丘而天子親蒞之此萬世不可易之理也
議者以爲當今萬乘儀衛加倍于古方盛夏之時不
可以躬行乃欲改用它月不惟無所據依又失所以
事地順陰之義必不得已宜卽郊祀之歲於夏至之
日盛禮容具樂舞遣冢相攝事雖未能皆當于禮庶

幾先王之遺意猶存焉詔禮院速詳定以聞禮官請如瑛議設宮縣樂文武二舞改制樂章用竹冊匏爵增配帝犢及捧俎分獻官廣壇壝齋宮修定儀注上之而判太常寺王存知禮院曾肇言古之祭祀或天子親行或有司攝事不過此二者而已今于攝事之中又分隆殺蓋古所未有也且遣官雖重終非親祀恐于天地父母之義有所未順瑛本以合祭非禮欲革去之然其所陳于禮亦未見其可今夏至日逼卽乞且依舊制其親祀之禮仍乞詔詳定郊廟禮文所精加講求裁定其當以正後世之失庶合先王之意判太常寺李清臣亦言天地之祀萬國觀法未易輕言今夏至已近而樂舞未修樂章未製八變之音未及習齊祭之服未及成齋宮未及立壇壝未及廣牲

犢未嘗在滌竊慮有司速於應辦或致滅裂有失嚴恭伏乞更加詳酌御批張璪之議在今固無以易可如清臣言逡巡以盡衆說遂詔禮院更加講求陸佃言竊觀張璪所請陛下親郊夏日至祀地自如璪議其冬至祀天之明日準古方望之事因令祀地北郊而以海嶽四瀆山林川澤之神凡在園丘墳陞舊從祭者皆得與享亦遣冢宰攝事竝如夏至祀儀是則親行大禮合祭雖革而天地之神自得用類以禮從祀以昭陛下尊天親地之義然而郊後必有方望之事經證明白固當攷復至於祀地雖未有顯據而以倫類求之方望且祀則地祇助天布功又其大者安得而遺也謹案舜典類有上帝而無日月星辰禋有六宗而無太祖望有山川而無大祇周官大宗伯祀

有上帝而無五帝有司中司命而無司祿祭有社稷五祀而無大祇有嶽而無四瀆有山林川澤而無邱陵墳衍享有先王而無先公則祀所秩上下比義皆從可知故也詳定所以佃所稱未有顯據難以施行

乙丑閣門言每歲盛暑御後殿便于決事乞自五月一日至七月終當御前殿日閣門取旨如得旨御後殿卽放朝參詔今三伏內五日一御前殿荆湖南路安撫司言知邵州關杞議於溪峒徽誠等州鎮立成寨屯兵及守禦招納之策乞下轉運使相度詔謝景溫朱初平趙楊相度利害及處置後經久不致生事保明以聞其後建置如杞議壬申遼以平州民初復業免其租稅一年己卯蜀國長公主薨主下嫁王詵事詵母至孝中外稱賢主疾甚太后皇后

臨問帝繼至見主羸瘠伏席而泣親持粥食之主爲
帝彊食翼日不起帝未朝食卽駕往望第門而哭賜
主家錢五百萬輟朝五日追封越國謚賢惠詵以待
主疾與婢姦落駙馬都尉責授昭化軍節度行軍司
馬均州安置甲申復命韓存寶經制瀘夷詔改
都大提舉導洛通汴司爲都提舉汴河隄岸司庚
寅詳定朝會儀注所言今定大慶殿之後門內東西
設幄爲閣又於殿展左右設帟於東西房以爲乘輿
出入所由之地又言朝會所陳平輦逍遙舊設于西
朶殿今宗室坐西朶殿賜酒欲移平輦等陳於東西
龍墀上竝從之遼主以旱禱雨令左右以水相沃
俄而雨降六月戊戌禮院言越國長公主薨在慈
聖光獻喪制之內案禮重喪未終遭輕喪自當易服

以示恩意卒事則復常真宗諒陰爲乳母秦國夫人服總禪未除亦爲許國長公主成服今爲慈聖光獻太后服已在易月之外宜爲越國長公主舉哀成服從之是日遼主駐納葛樂庚子同判太常寺王

存言近詔祕書監劉几赴詳定郊廟禮文所議樂伏見禮部侍郎致仕范鎮嘗論雅樂乞召鎮與几參攷得失從之初鎮致仕居都城外之東園每遇同天節卽乞隨散官班上壽尋有詔鎮班見任翰林學士上仍自今致仕官遇誕節及大禮許綴舊班後鎮遷居潁州於是入對閣門奏鎮失儀有詔放罪仍詔自今致仕官造朝失儀勿劾著爲令詳定禮文所言請自今皇帝親祠郊廟搢大圭執鎮圭每奉祀之時既接神再拜則奠鎮圭爲摯執大圭爲笏當時搢笏君

尊則不摺別於臣下也所有儀注皇帝摺鎮圭皆沿襲之誤乞從改正詔候製到大圭日施行又言自今親祠郊廟羣臣冕服助祭執笏或當事則摺笏陪位官亦合冕服助祭從之 丙午詔中書詳定官制罷兵部句當公事官 詔河北河東陝西路各選文武一員提舉義勇保甲 戊申遼以度支使王績參知政事 庚戌女直貢於遼 壬子詔罷中書門下省主判官歸其事於中書 乙卯參知政事章惇上導洛通汴記以元豐導洛記爲名刻石於洛口廟。己未詳定禮文所言皇地祇神州地祇大社大稷其祝版與牲幣饌物瘞於埆坎又言郊廟明堂告神冊使中書侍郎讀之非是請改命太祝又言親祠郊廟執事之官皆一切臨時取充位而已宗室及陪祠官則

無預于執事不應古義請親祠南郊薦徹籩豆簠簋俎饌以朝臣充太廟以宗室遙郡刺史以上充又言今禘祫以功臣配享而冬烝不及與經不合請每遇冬烝以功臣配享其功祫配享皆罷詔讀冊以史官攝太祝郊廟執事官選無過人冬享禘祫及親祠並以功臣配享餘皆從之

秋七月戊辰遼主觀市

庚午河決澶州澶州孫邨陳埽及大吳小吳埽決詔

外監丞司速修閉初河決澶州也監丞陳祐甫謂商胡決三十餘年所行河道填淤漸高隄防歲增未免泛濫今當修者有三商胡一也橫壠二也禹舊迹三也然商胡橫壠故道地勢高平土性疏惡皆不可復復亦不能持久惟禹故瀆尚存在大伾太行之閒地卑而勢固秘閣校理李垂與今知深州孫民先皆有

修復之議望召民先同河北漕臣一員自衛州王供
埽案視訖于海口從之 丁丑詳定禮文所言明堂
儀注設御位於中階下之東南西嚮謹案古者人君
臨祭立于阼其臨祭就位于阼階下大夫士禮也自
曹魏以來有司失之伏請設皇帝版位于阼階之上
西嚮太廟景靈宮亦如之從之 癸未遼主爲皇孫
梁王延禧設旗鼓伊喇六人衛護之 甲申遼主獵
於沙嶺 丙戌以彗星見避殿減膳詔求直言 丁
亥詔中書曰朕惟先王制行以赴禮孝莫大于嚴父
嚴父莫大於配天配天一也而屬有尊親之殊禮有
隆殺之別故遠而尊者祖則祀於郊之園丘而配天
邇而親者禰則祀於國之明堂而配上帝天足以及
上帝而上帝未足以盡天故園丘祀天則對越諸神

明堂則上帝而已故其所配如此然後足以適尊親
遠邇之義而歷代以來合宮所配既紊於經乃至雜
以先儒六天之說皆因陋昧古以失情文之宜朕甚
不取其將來祀英宗皇帝於明堂惟以配上帝餘從
祀羣神悉罷

戊子太白晝見

戶部侍郎致仕范

鎮言乞下京東京西河東河北陝西轉運司量立賞
格求訪真黍以審音樂

己丑詳定禮文所言請自

今乘輅不執圭及乘大輦亦不執又言古者宗廟室
中爲石以藏主謂之宗祏請遷廟主藏于太祖太室
北壁中帝后之主各共一石室禮記曰天子之席五
重今太廟几筵皆不應禮請改用筦筵紛純加繅席
畫純加次席黻純左右王几祭祀皆繅次各加一重
並筦筵爲五重並從之

庚寅熙河路經略司言西

界首領禹臧結逋藥蕃部巴鞠等以譯書來告夏國
集兵將築撤逋達宗城於河州界黃河之南洮河之
西帝曰若如所報乃屬河州之境豈可聽其修築深
慮經略司不詳上件所指地分都無爲備驅逐約闌
次第可速下本司多備兵馬禁止之 八月辛卯朔
詳定禮文所言明堂昊天上帝禮神之玉當用蒼璧
今用四圭有邸請改用蒼璧禮天其有司攝事五帝
亦乞依大宗伯禮神之制陳玉各倣其方之色從之
戊戌詔兩制臺諫至總管監司各舉堪應武舉進
士一人以名聞 庚子檢正中書戶房公事畢仲衍
上所修備對言周家冢宰歲終令百官府正其治受
其會小宰以敘受羣吏之要所謂會要者正今中書
之所宜有也自漢至唐曠千百年莫知議此故有決

獄錢穀之問而不克對者剋自審意俾加纂集臣攬
撫故實僅就卷秩凡爲一百二十五門附五十八件
爲六卷事多者分上中下共爲十卷詔中書門下各
錄一本納執政仍分令諸房揭帖初書成仲衍欲求
上覽以冀功賞帝以爲此書乃臣備君問之書不當
奏御故有是詔 乙巳詔中書朕嘉成周以事建官

以爵制祿萬事條理監於二代爲備且隆國家受命
百年四海承德豈茲官政尙愧前聞今將推本制作
董正之原若稽祖述憲章之意參酌損益趨時之宜
使臺省寺監之官實典職事領空名者一切罷去而
易之以階因以制祿凡厥恩數悉如舊章其應合行
事件中書條具以聞 祕書丞同知禮院楊傑言十
二者律之本聲也四者律之應聲也本聲重大應聲